

17/08/2001

Washington diberi amaran boleh tertipu jika sokong Anwar

KUALA LUMPUR, Khamis - Amerika Syarikat, yang dua kali melalui pengalaman pahit dengan pemerintahan fundamentalis Islam iaitu di Iran dan Afghanistan, diberi amaran bahawa ia boleh tertipu bagi kali ketiga jika menyokong usaha bekas timbalan perdana menteri, Datuk Seri Anwar Ibrahim, menggugat kedudukan kerajaan Malaysia.

Amy Ridenour, presiden Pusat Kebangsaan Penyelidikan Dasar Awam, sebuah kumpulan bijak pandai berkecuali di Amerika berkata, Anwar mempunyai hubungan akrab dengan fundamentalis radikal Islam dan telah memulakan kempen perhubungan awam antarabangsa untuk menggugat kedudukan kerajaan Malaysia.

Dalam komentar yang diterbitkan oleh akhbar Washington Times pada Rabu, Ridenour berkata, isteri Anwar, Datin Seri Dr Wan Azizah Wan Ismail melawat Amerika baru-baru ini untuk mendapatkan sokongan bagi suaminya yang kini menjalani hukuman penjara 15 tahun kerana kesalahan rasuah dan liwat.

"Usaha itu melagakan Anwar dengan bekas mentor beliau, Perdana Menteri Datuk Seri Dr Mahathir Mohamad. Permusuhan itu mencetuskan kemelut politik. Atas pertaruhan yang orang Amerika akan bersimpati kepada seorang wanita yang suaminya dalam penjara, kumpulan lobi yang dikawal suaminya mengatur lawatan itu," kata beliau.

Dalam memberikan latar belakang Anwar, wanita itu berkata sejarah politik Anwar bermula sebagai aktivis pelajar di Universiti Malaya (UM) pada 1960-an di mana beliau mula membuat ucapan berapi-api mengenai Islam di dalam dan di luar universiti.

Ridenour berkata, Anwar kemudian mengasaskan Angkatan Belia Islam (Abim), pergerakan fundamentalis pemuda Islam bertujuan membawa kebangkitan semula Islam di Malaysia.

Beliau juga menyatakan, Anwar mengembara ke Iran untuk bertemu Ayatollah Khomeini yang mengetuai revolusi Islam di Iran dan ABIM - mengambil sedikit fahaman Karl Marx dan banyak fahaman radikal Islam - mengutuk eksploitasi buruh dan "semua perkara yang bertentangan dengan semangat keadilan Islam".

"Sejak Anwar dipenjarakan pada 1999, kumpulan pelajar fundamentalis Islam telah menguasai kesatuan pelajar di hampir kesemua universiti yang membawa kepada aktiviti antikerajaan.

"Sebagai contoh, pada 4 Julai lalu, perbuatan khianat memusnahkan bangunan di Universiti Malaya. Parti Islam Malaysia (Pas) menambah bilangan kerusi di Parlimen," katanya.

Ridenour mengimbau pemerintahan Khomeini pada 1979 bermula dengan krisis tebusan 444 hari di Kedutaan Amerika Syarikat di Teheran dan mendapati tiada jalan untuk berunding, berkompromi ataupun bercakap dengan seorang pemimpin yang begitu kuat menentang demokrasi dan tidak toleran seperti Khomeini.

Katanya, Afghanistan memperkukuhkan pengajaran bagi Amerika. Selepas Amerika menyumbangkan jutaan ringgit dan maklumat risikan penting bagi puak Mujahiddin yang anti-Soviet, satu kerajaan fundamentalis Islam, Taliban, mengambil alih kuasa.

"Taliban telah membentuk satu rejim yang jauh kurang toleran daripada yang pernah dibayangkan oleh Leonid Breznev, pemerintahan diktator imam-imam yang memusnahkan peninggalan bersejarah agama Buddha dan merotan di khalayak ramai wanita yang dituduh berjalan bersama seorang lelaki yang

tiada tali persaudaraan dengannya.

"Adalah lebih baik Amerika Syarikat mengelakkan pengalaman pahit yang ketiganya," beliau memberi amaran.

Ridenour juga memuji Malaysia kerana pencapaian luar biasanya dalam pembangunan dan kemakmuran dan sebagai negara demokratik yang stabil.

"Malaysia menikmati pertumbuhan ekonomi yang mengagumkan, dengan keluaran dalam negara kasar (KDNK) tahunan meningkat 5 peratus hingga 10 peratus sejak sedekad lalu.

"Dalam senarai ekonomi Asia, KDNK per kapita Malaysia lebih kurang AS\$7,370 (RM28,000) dan berada di belakang Korea Selatan dan di hadapan tujuh lagi negara," katanya.

Malaysia juga adalah rakan perdagangan ke-12 terbesar Amerika dan pasaran eksport ke-17 terbesar dengan perdagangan Amerika-Malaysia melampaui perdagangan Amerika bersama India, Indonesia dan Russia disatukan.

"Malaysia bukan tanpa kecacatan. Sistem perundangan Malaysia, seperti di Amerika adalah berdasarkan `common law' Inggeris, tetapi didakwa berlaku pencabulan," kata Ridenour.

Ridenour menyimpulkan komentarnya dengan berkata: "Amerika Syarikat tertipu di Iran dan Afghanistan. Adalah berbahaya untuk ditipu sekali lagi". - Bernama

(END)